

Leipzig, 9. Juni 1563

Von Joachim Camerarius d. Ä.

Druck: Camerarius, Epistolae S. 479-481.

Lit.: Hartig S. 11.

S. D. His diebus accepi litteras tuas ἐνοχλούσης τι ἡμῖν ἐμφράξεως νεφριτικῆς. A quibus hoc molestiae accessit, quòd meas litteras quibus respondi tuis proximè allatis et D. Tuppij, vnà cum ijs quas scriptas ad hunc tradiderat mihi Cl[arissimus] V[ir] D. Georgius, tibi non fuisse redditas intellexi. ἐπεστειλάμην δὲ καὶ περὶ ἄλλων τινῶν πολλά τε καὶ παντοῖα. Et de Tuppio ostendi, ὅτι ζητεῖν τι ἐνταυθοῖ τοιοῦτον δοκεῖ ὅμοιον τῷ τῶν ἀδωνάτων ἐφίεσθαι. Neque ego nisi commoda aliqua adiuuare in hac parte quenquam possum. Id autem leue est, vel nihil potiùs. Quia quamvis audiantur commendationes πρὸς τῶν πάνυ, memoria tamen illarum non conseruatur. Hic verò qui doceant, tam multi sunt, vt dimitti potiùs posse aliqui, quām plures accersi debere videantur. Petij etiam abs te, vt Tuppium verbis meis salutares officiosè. Eae litterae datae sunt cuidam qui hic in officina Pharmacopolica operas dedisset, et istuc se diceret proficisci. Si igitur non peruererunt ad vos, equidem fero molestè, sed culpa tamen careo negligentiae. Quod autem nunc scribis de instaurata nostra Academia et vestratibus, nunquam his annis quibus ego hīc dego totis 20. illa quidem collapsa iacuit, etsi frequentia non fuit semper eadem. Vestratibus autem, vt omnibus, copia semper dari poterit communiter capiendo cibum in collegij Paulini aedibus, modò eo tempore adueniant, quo locus ad recipiendum vacet. Iam enim concluae, in quo ille coetus pascitur, mensis erat completum. Sed scis in congregationibus scolasticis tanquam marinis fluctibus accessiones et recessiones esse crebras et subitas. Etsi autem habetis hīc amicum, tamen meum quoque vestris studium, si qua in re nauari poterit, defuturum non est. Hīc et in vicinia eluuies aquarum fuit ingens, atque nunc etiam pluiae crebrae sunt, et belli Danici apparatus maximi procedunt. Scripsi tibi nuper de quadam mea cupiditate cognoscendi explicationem τοῦ Θέωνος (cuius librum περὶ τῶν παρὰ Πλάτωνι μαθηματικῶν in bibliotheca generosi D. Domini Io[annis] Iacobi esse scirem) eius loci qui de fatalibus imperiorum temporibus extat ἐν τῇ ἡ τῶν πολιτειῶν, notatus ab Aristotele ἐν τῷ τῶν πολιτικῶν ī.¹ petijqúe tunc abs te, vt curares eum describendum: quod quidem bona gratia Domini et sine tua molestia fieri posset. οὐ γάρ τι εἴωθα ἐπιτιθέναι τοῖς φίλοις δεόμενος, ὅπερ ἀν τις φέρων ἀχθεσθείη. De hoc igitur tantum curae laborisqúe suscipies mea caussa, quantum neque graue futurum sit, neque difficultatis quicquam habiturum. Vale. Adiunxi his conuersum edictum Gallicum in sermonem Latinum. Sed ea audiuntur iam, vt verear ne mox alia lecturi simus. Dominum Hencelium meis verbis vt officiosiss[ime] salutes, à te peto. Iterum vale. Lipsiae. 5. Id[us] Junij. 63.

¹i] ή Druck, im Errataverzeichnis korrigiert.